

PAGTULON-AN 18 – TAN-AWA, ANG INYONG HARI NAGASINGABUT NGANHA KANINYO

Mateo – Marcos – Lukas - Juan

TEMA: Sa pagtudlo sa pagpaila-ila ni Cristo ngadto sa Iyang Katawhan.

Human sa pagtukod pag-usab sa mga pader sa Jerusalem pinaagi ni propeta Nehemias, nagpakahilum ang Dios sobra sa upat ka gatus ka ug kalim-an (450) katuig. Nakalimut ba ang Dios sa Iyang mga saad? Muabut pa ba ang Hari? Sa kalit usa ka tingog ang mibutho. Ang tingog sa propeta nga si Juan nga Bautista. Siya nagaingon, “Paghinulsol kamo, kay ang gingharian sa langit haduol na...andama ninyo ang dalan sa Ginoo ug tul-ira ninyo ang Iyang mga agianan,” Mateo 3:2-3. Ang DALAN SA GINGHARIAN kinahanglan himuong matul-id alang sa pag-abut sa Hari.

Mga traynta (30) katuig sa wala pa si Juan miabut nga nagawali sa Iyang mensahe, usa ka bata natawo sa Betlehem. Ang Iyang ngalan mao si JESUS, nga nagakahulogan, “si Yahweh mao ang Manluluwas” o “si Yahweh moluwas.” Siya magaluwas sa Iyang katawhan gikan sa ilang mga kasal-anan, Mateo 1:21-23. Sulod sa traynta (30) katuig, gamay lamang kaayo ang nadungog mahitungod sa bata nga natawo didto sa Betlehem hangtud si Juan nga Bautista miabut nga nagawali: “Paghinulsol kamo.” Ug unya ang Jerusalem nanggawas ngadto kaniya, ug ang tanan sa Judea ug tanang mga kasikbit nga dapit sa Jordan, ug gibautismohan sila ni Juan didto sa suba sa Jordan, sa nagasugid sila sa ilang mga sala,” Mateo 3:5-6. Ang bautismo sa tubig, sa dihang nagasugid sila sa ilang mga sala, mao ang paagi sa Israel aron sa paghimo nga tul-id sa DALAN SA GINGHARIAN ug sa pag-andam sa pag-abut sa ilang Hari.

Sa dihang nakita ni Juan si Jesus nga miadto kaniya, siya miingon, “Tan-awa mao kana ang Cordero sa Dios nga magakuha sa sala sa kalibutan,” Juan 1:29. Tuod, si Juan dili gayud unta mobautismo ni Jesus, apan atong makita unsa ang tubag ni Jesus didto sa Mateo 3:15. Human niini, si Jesus gidala sa Espiritu Santo ngadto sa kamingawan aron pagatintalon sa tulo (3) ka higayon sa yawa. Sa matag pagtintal, si Jesus mikutlo sa Pulong sa Dios ug unya ang yawa mibiya Kaniya. Makahimo ka ba sa pagkutlo sa Pulong sa Dios aron ka makabarug sa pagtintal?

Human niadto, si Jesus misugod sa pagwali nga nagaingon, “Paghinulsol kamo, kay ang gingharian sa langit duol na,” Mateo 4:17. Si Jesus nagpamatuod gayud sa Iyang kaugalingon nga Siya Anak sa Dios, ang Hari sa kamatuoran. Siya mao ang gitagna sa mga propeta nga muabut. Siya nagahimo sa gamhanang mga milagro, nagaayo sa mga masakiton ug mga buta, mipahunong sa mga balud ug milakaw sa ibabaw sa dagat, mipagawas sa mga demonyo, ug bisan pa ang pagbuhi sa mga patay.

Siya nagpili ug dose (12) ka mga tinun-an ug mihatag kanila ug kagahum ibabaw sa mga mahugaw nga espiritu, aron sa pagpagawas kanila, ug sa pag-ayo sa tanang matang sa mga sakit, Mateo 10:1. Siya nagpadala kanila uban sa mga sugo nga lahi kaayo sa mga ginawali karong panahona. Atong tan-awon ang mga sugo ni Jesus ngadto sa dose (12) ka mga tinun-an: “Pangadto kamo dili sa agianan sa mga Gentil, ug sumulod kamo dili sa kalungsuran sa mga Samarianhon, kondili pangadto hinuon kamo sa mga nangawalang karnero sa banay ni Israel...ug magaingon, ‘Ang Gingharian sa langit haduol na.’ “Ayoha ang mga masakiton, banhawa ang patay, hinloi ninyo ang mga sanlahon, pagulaa ninyo ang mga yawa. Nakadawat kamo nga walay bayad, busa panghatag usab kamo nga walay bayad. Ayaw kamo pagbalon ug bulawan o salapi o tumbaga diha sa inyong mga bulsa...o duha ka kamisola, o mga sapin,” Mateo 10:5-10.



Tinubdan: Sweet Publishing – kini ilustrasyon lamang sa pagwali ni Juan Bautista

Usa ka adlaw, nahimo ang usa ka talagsaong hitabo. Didto sa atong mapa, nagapanaw kita subay sa DALAN SA GINGHARIAN; sa walay pagpakabana sa DALAN SA MGA GENTIL. Ang Israel mao unta ang sandayong diin ang Dios makabuhat bisan Iya nang gisalikway ang mga Gentil sa dugay na kaayong panahon didto sa tore sa Babel.

Si Jesus nahiadto sa kayutaan sa Tiro ug Sidon, sa dihang adunay babaye nga taga Canaan miadto Kaniya ug misugod sa pagsiyagit nga nagaingon, “Ginoo, Anak ni David, kaloy-i intawon ako, ang akong anak nga babaye ginasakit pag-ayo sa usa ka yawa.” Apan wala Siya mitubag bisan usa ka pulong. Ug ang Iyang mga tinun-an miduol Kaniya ug nagahangyo nga nagaingon, “Papaulia siya, kay ania gisunod kita niyag siyagit”. Apan Siya mitubag kanila nga nagaingon, “Ako gipadala ngadto lamang sa mga nangawalang karnero sa banay ni Israel. Apan ang babaye miduol ug miluhod sa Iyang atubangan nga nanag-ingon, “Ginoo, tabangi intawon ako.” Apan Siya mitubag kaniya ug miingon, “Dili matarung nga kuhaon ang tinapay nga alang sa mga anak ug iitsa ngadto sa mga iro.” Siya miingon, “Tinuod kana, Ginoo, ngani bisan pa ang mga iro magakaon man sa mga mumho nga matagak gikan sa lamisa sa ilang mga agalon. Ug kaniya mitubag si Jesus nga nagaingon, O babaye, pagkadaku sa imong pagsalig, pagabuhaton kini alang kanimo sumala sa imong gusto. Ug dihadiha naayo ang iyang anak nga babaye.

Ang kinatibuk-ang kasaysayan niining sugilanon makita sa Mateo 15:21-28 ug Marcos 7:24-30. Kining Gentil nga babaye nakadungog sa gahum sa Ginoong Jesus ug miadto gikan sa DALAN SA MGA GENTIL aron sa pagpangayo sa panalangin. Gipasidunggan ni Jesus ang iyang pagtoo bisan tuod ang panahon nga gipanagna nga ang mga Gentil makaambit sa mga panalangin didto sa Ginghamarian wala pa muabut.

“Tan-awa, ang imong Hari nagaanhi kanimo, maaghop ug nagakabayo sa asno,” (Mateo 21:5). Ang Israel nagatawag kang Jesus gikan sa Nazaret nga Anak ni David, apan ang mga labawng sacerdote ug mga escriba wala mahimuot, Mateo 21:15. Busa, ang nasud sa Israel wala na modawat sa ilang Hari.

Mobalik kita didto sa panahon nga si Jesus gibautismohan. Ngano man nga Siya nagpabautismo? Ang Bibliya nagaingon sa Mateo 3:15: “aron sa pagtuman sa tibuok nga pagkamatarung.” Ang bautismo usa ka simbolo alang sa Israel sa paghugas sa ilang mga sala, Buhat 22:16. Si Jesus walay sala, apan dinhi Siya sa kalibutan sa maong panahon, nagasugod sa pag-angkon sa dapit sa mga makasasala, ug kinahanglan pagahimoon Siya nga sa tanang kahimtang mahisama sa iyang mga igsoon, aron Siya mahimong maloluy-on ug kasaligang Labawng Sacerdote sa pagpangalagad alang sa Dios (Hebreohanon 2:17), aron sa paghatag sa Iyang hingpit nga pagkamatarung.

Ang Kasulatan nagatudlo nga si Jesus usa ka Propeta, usa ka bantugan nga Magtutudlo, ang Hari sa Israel, ang Cristo. Sa Iyang pagpabautismo, makita nato Siya ingon nga Labawng Sacerdote ngadto sa ginghamarian sa mga sacerdote - ang nasud sa Israel: “ug alang Kanako kamo mahimo nga usa ka ginghamarian sa mga sacerdote ug usa ka balaan nga nasud,” (Exodo 19:6). “Ug kamo pagahingalan nga mga sacerdote ni Jehova, ang mga tawo motawag kaninyo nga mga ministro sa among Dios, kamo magakaon sa mga bahandi sa mga nasud, ug sa ilang himaya kamo magapangandak sa inyong kaugalingon,” (Isaias 61:6).

Ug sa 1 Pedro 2:19, 22 ato kining mabasa: “Apan kamo maoy usa ka kaliwatan nga pinili, ang kahugpungan sa mga harianong mga sacerdote, ang nasud nga balaan... pagkinabuhi kamo nga maligdong taliwala sa mga Gentil...” Sa pagpili ug mga sacerdote, ang Kasugoan nagahatag ug mga lagda ug mga seremonyas nga pagasundon, apil ang paghugas sa tubig kanila, (Exodo 29:4). Ang seremonyas sa paghugas gihimo sa dihang gibautismohan si Jesus. Ang tanang mosulod sa pag-alagad didto sa tabernakulo kinahanglan magpangidaron ug traynta (30) katuig, Numeros 4. Gikan sa kapitulo tres (3) hangtud sa diyes (10) sa sulat sa mga Hebreohanon ug Salmo 110:4, nagatug-an nga ang Dios Amahan nagatudlo sa Iyang kaugalingong Anak nga Hingpit Labawng Sacerdote, sumala sa laray ni Melquisedec.

Sa atong sunod nga pagtulon-an, atong pagatan-awon giunsa ni Jesus pagsagubang ang pag-antus sa kamatayon sa Kalbaryo aron mahingpit ang buhat sa paghimo Kaniya nga sala alang kanato. Ang maong buhat nahingpit na! Ug maluwas ka pinaagi sa pagtoo nga Siya namatay alang sa imong mga sala, Siya gilubong ug nabanhaw sa ika tulo (3) ka adlaw, 1 Corinto 15:3-4.

SAG-ULOHON NGA BERSIKULO: “Tungod kanato Siya nga wala makasinati ug sala gihimo Niya nga sala, aron diha Kaniya kita mahimong pagkamatarung nga anaa sa Dios,” 2 Corinto 5:21.

PAGTULON-AN 18 – BULOHATON

Direksyon: Isulat ang hustong tubag sa mga pamahayag o pangutana.

1. Human sa kapin upat ka gatus ka ug kalim-an (450) katuig nga pagpakahilum sa Dios, ang Israel nakadungog sa tingog ni _____ nga nagaingon _____ Mateo 3:1-3.
2. Ang Israel nangandam alang sa pag-abut sa Hari pinaagi sa _____ Mateo 3:6.
3. Si Juan nagaingon nga siya nagabautismo sa tubig alang sa paghinulsol, apan naay Usa nga muabut sunod kaniya magabautismo _____ Mateo 3:11.
4. Si Jesus miingon nga Siya nagpabautismo aron sa pagtuman sa tibuok nga _____ Mateo 3:15.
5. Si Jesus naghatag sa Iyang mga tinun-an ug gahum aron sa paghimo ug mga milagro, aron ipamatuod nga ang Hari ug ang Ginghamarian sa Langit tinuod nga duol na. Hinganli kining mga milagro sa Mateo 10:8:

Tan-awa ang mga bersikulo ug tubaga ang mosunod nga mga pangutana?

6. Nganong gisultihan man ni Jesus nga *dili sila mangadto sa mga Gentil*? Marcos 7:27.

7. Nganong sa kadugayan gitubag man ni Jesus ang hangyo sa babaye nga Gentil? Mateo 15:28. _____
8. Ngano nga kini nga bahin sa DALAN SA KINABUHI gihinganlan man ug DALAN SA GINGHARIAN? Mateo 21:5. _____
9. Ngano nga dili kinahanglan sa mga nagapuyo niining panahon sa grasya ang magpabautismo sa tubig aron makadawat sa pagkamatarung? Buhat 22:16. _____

10. Isulat ang 2 Corinto 5:21: _____
